

點蒼山人詩鈔

重刊點蒼山人詩鈔序

吾友王子襄臣以太和沙獻如先生點蒼山人詩鈔四冊及贖臺紀恩一冊示余余惟詩所以理性情三百篇大旨歸本於忠厚少陵託情忠愛淵明寄意高遠是故詩之至者皆得性情之正抑亦詩至而性情自正焉耳吾讀先生詩纏綿悱惻一往情深其字裏行間隱寓太和翔洽之氣本詩道以治民其感人之深也必矣捐金贖臺爲千古服官之佳話豈偶然哉豈偶然哉姚姬傳氏序先生詩謂先生爲詩不妨爲政夫先生之詩則豈特不妨爲政而已嗚呼先生往矣流風遺韻茲其存者

王子其爲傳之哉

中華民國三年 月

日後學東川唐繼堯序

點蒼山人詩鈔序

前清乾嘉之際滇中人才號極盛昆明錢南園晉寧劉寄庵趙州師荔扉洱源王樂山太和沙獻如諸先生其最著者也諸先生詩文行世已久近雲南輯刻叢書復取以鈔版而太和王君襄臣又檢沙先生所爲點蒼山人詩四卷附贖臺紀愬一卷行將攜赴滬上付印而屬可澄爲之序夫沙先生之詩姚姬傳劉寄庵兩先生序之詳矣可澄何能重先生獨念先生因事罣吏議論罪戾邊賴懷遠懷寧建德霍邱四縣之民爲之湔雪爲之營救旣不可得則爲之釀金贖罪合詞籲陳期得請而

後已此非先生之有所風示也亦非有形勢之驅迫也  
徒以實惠在民民之感動奮發咸出於不自己奔走呼  
號卒回天聽先生之名乃益顯於天下孔子曰斯民也  
三代之所以直道而行孟子曰憂民之憂者民亦憂其  
憂然則人亦何憚而不爲良吏哉抑又聞先生之孫孝  
廉名蘭者當杜文秀之亂奉大府檄說文秀降文秀不  
能從孝廉持之力遂遇害實爲王君襄臣之外祖孝廉  
風節綽有祖風間爲詩歌亦具有家法君子之澤歷世  
未湮嗚呼是可風矣

可澄

持節巡滇私幸武南園寄庵

諸先生之里又因王君而盡讀沙先生之詩故不辭而

爲之序冀以告服官滇省與滇人之筮仕他省者使知所取法又以見先生不必以詩傳而其詩固有不得不傳者此蓋有存於詩之外者焉後之學者其亦知所務也

民國四年中秋雲南巡按使任可澄序於滇垣節署

點蒼山人詩序

沙君獻如余故人錢南園侍御之友也南園以直節名當世而其詩雄厚古勁高越塵俗今獻如方以吏績顯而又兼詩人之高韻逸氣幽潔之思雋妙之語峯起疊出信乎滇之多奇士也余別南園三十餘年矣來皖中值獻如爲之令因得讀其詩又相對共感歎南園之喪夫見南園之相知誼已加重矣况其爲英傑之才卓然可畏如獻如者哉世謂作詩或妨爲政余謂是有辨焉如山林枯槁之士苦思累日夜而僅得一韻之工者其妨於政事必矣其才小也天下巨才揮斤唾咳以爲文

章未嘗求工而自工者其索不勞其出無窮建安曹氏  
軍旅橫槩而可以賦詩而況於平世臨民布政優優者  
乎夫獻如之才大才也其無病於爲詩明矣前歲望江  
令君師荔扉爲南園刻詩集成余既序之今又欣獻如  
之有是集也故復書以爲之序云嘉慶九年三月桐城

姚鼐序



序

余家居時聞皖江有沙明府循吏也嘗以无妄之災將  
北戍軍白舊所莅懷遠之民老幼驚惶奔走相告集餒  
金數千兩迎赴大中丞初公於臨淮途次代爲籲求免  
罪號哭聲不絕於道所會署懷寧諸縣士民亦醵數千  
金遠近奔皖城哀請納餒贖罪曰明府之親老矣家又  
貧設遠戍軍台居者有懸磬之嘆行者深叱咤之悲四  
邑之民其何以忍此中丞感其意據情入奏天子憐而  
赦之飭還餒金四邑之民復聚而請願以飭還之金助  
明府清夙累奉親歸里時沙明府之名膾炙大江上下

余嘗聞而羨曰爲民牧者不當如是耶而惜未之見也  
自余仕於粵調任東莞每侍太守高青書夫子談及明  
府事夫子曰沙君號雪湖余僚友也其人篤於孝友而  
卽以孝友之道治百姓性介介不苟取所得之金歸里  
後分潤親族餘千數金奉老親以終天年今已蕭然無  
餘蓄矣且工於詩凡舟中馬上偶有所得援筆立成別  
已數年想行笥中佳句必又裒然成集也余聞之益慕  
雪湖之爲人而迫切晤其面讀其詩以快十數年之向  
慕而未知其能遂所欲否也戊寅夏余過青書夫子寓  
館聞雪湖來欣然謁之惜以公冗叢雜立談片刻而散

而卓犖不羣之概亦略得一斑矣暇日雪湖攜詩稿來  
詳加披讀其五言古詩沖淡高遠得淵明飲酒之遺意  
七言淋漓頓挫公孫大娘舞劍器渾脫當如是爾近體  
律細思深或爽如蒼鷹脫臂或清如銀瓶瀉水其雄渾  
則天風海山其秀削則遠春流水其沈鬱幽折之氣激  
昂慷慨之音有觸則鳴發於楮表殆所謂窮而後工者  
耶斯亦情之不能自己者耳夫乃嘆雪湖循吏亦才人  
也惜把晤未久怱怱將去高青書夫子亟爲付梓屬序  
於余余久荒筆墨且叢冗無一刻暇謹臚所聞見草率  
成篇工拙所不計也皆嘉慶戊寅八月朔後二日江左

愚弟仲振履石庵甫頓首拜撰

序

人之精神意氣發爲文章猶山川之出雲恒各肖其土地之宜時物之變千態萬狀不可究極而其至奇者則偶一見焉必有所應也滇自漢文教始通及前明楊文襄公執耳騷壇風雅振起延綿數百載至今日爲尤盛保山袁氏兄弟儀雅時亮兩君相繼纂刻兩朝滇南詩略各數十卷金碧蒼珥間作者大備而其中卓然名家者不過數輩蓋其人可傳其詩乃益可傳也吾近得兩人焉一爲師君荔扉一爲沙獻如先生兩君皆以名孝廉作宰安徽所至有政聲士大夫翕然稱之荔扉吾未

識其面誦其詩知其人信其必傳於後無疑也先生始與吾相遇於亳州官廡商榷古今風發泉湧有不可一世之槩時方編理太和當渦流泛溢楚豫教匪出沒鄰境先生撫卹災黎訓練義勇咸有法則民賴以安乃時時出其篇什與余相質任情抒寫璧合璣馳予固已服其才之大氣之盛不瓌瓌比古人以爲工而自樹一幟矣及予踈皖上先生亦渡淮而南補授懷遠令未幾值宿州之亂宿與懷相距百餘里懷城不可守官民咸居郭外一旦變生肘腋視太和之役倉遽百倍先生胸有成竹應變若神民恃以不恐大吏重其才調署懷寧懷

爲安省首邑理繁治劇游刃有餘吾鄉父老稱神君者  
不輟於口前後十餘年間凡三易所治皆號稱難理又  
徃徃多故勞形苦心日無寧晷而先生之詩已哀然成  
帙矣嘉慶甲子予方僑寓秋浦選刻國朝詩萃懷遠許  
子叔翹以所刻先生點蒼山人詩集示予命予序余伏  
而讀之向之風神諧暢意致深婉者進而蕭疎清靚簡  
遠澹泊矣向之欽峭磊落奔騰放逸者進而變化出沒  
縱橫排奐不可端倪矣其間論古懷人感時紀事諸作  
崇論宏議遠見卓識纏綿悱惻之思溫柔敦厚之旨使  
讀者肅然而起悄然而悲感人之深何以至此此豈拘

拘於音律者之所知耶音律者之所知耶侯征南中郡觀瑞星  
文石之異以爲千百年後文運將興今三逸詩人蔚然  
興起而其才又足以展布設施爲世所用如先生者將  
繼文襄之業後先輝映如景星慶雲之麗天是編之出  
望風者必以先覩爲快予既選而刻之乃以夙所服膺  
者書之簡端豈有所重於先生哉紀其實焉耳嘉慶丙  
寅仲春治晚學生懷寧潘瑛拜書



點蒼山人鈔敘

予自乾隆辛丑歲計偕迄乙卯僕僕十五年中勞苦呻吟不蘄於爲詩而詩帙積矣鄉前輩錢南園侍御爲汰存百餘篇甲寅秋自京師出遊失之運河舟中庚子以前所爲詩經檀默齋先生採入滇南詩話若干首卷亦失之皆不能憶也歷遊吳越閩紀行小卷李春麓師爲點存十餘首嘉慶己巳免官歸故友袁蘇亭廣文見所刻皖江集四卷亟手出所摘錄於南園先生處爲汰存之百餘篇咋咋歸予天下有有心人如袁髯者哉如袁髯者哉少年狂興客子悽懷前夢宛然疵類滿紙是固

已棄之而竟不可棄耶莊子曰有生滅也移是不移是  
鳴蜩鷲雉不同而同予於詩夫亦移是爲快耳顧惟諸  
師長先生九原不作豔賞猶存良友如蘇亭亦偃然長  
逝則予斯集之披然賦者其何能以敝屣哉嘉慶戊寅  
六月沙琛自敘

序

人之身不能無所置人之心不能無所用人之才不能無所見而仕止久速喜怒哀樂之間亦若分試焉以迭徵其所爲有詩人出而後隨在可以置其身用其心見其才而所謂詩人者或數十年一遇或數百里一遇蓋遇之如此其難也矧在荒陬僻壤如吾鄉者而吾乃得見太和沙獻如先生始吾甲戌歲秋讀獻如荒山紀遊諸詩氣奇情邁絕眾離羣嘗題辭其後矣丁丑歲暮又得近作數冊讀之其氣奇如故其情邁如故其絕眾離羣亦如故詩人乎其點麓山西洱河靈秀之所鍾毓而

適際貞元會合之盛者乎吾鄉於是爲不乏人矣然是皆獻如年五十後失意暫息之所爲作也而其周攬名勝交遊賢豪蓬蓬勃勃不可遏抑之概皆於是乎見之若斯人者何常一日置其身於湫隘喧囂之境用其心於鄙猥凡近之域而輕見其才識向使吾不識其人而但讀其詩必以爲此名將相盛年得志者之所爲矣而獻如固如此哉獻如魁梧雄偉精明强健前此治績久入輿人誦中今將復作萬里行重爲世宙生民依賴無論論其詩且日富而未有窮也獻如不老余以爲尙可與言其使余歲得讀之爲幸哉敢書此以要獻如嘉慶

戊寅正月甲辰日寧州愚弟劉大紳序於五華山麓時  
年七十有二

後跋

右點蒼山人詩鈔四卷大理沙獻如先生所著也先生少負異才長益刻苦自勵與錢南園通劄師荔扉大令爲道義文字交尤好爲詩歌以見志洎舉孝廉仕皖江歷宰大邑慈惠及民所至有父母神君之譽雖簿書鞅掌中而於吟詠一事未嘗一日或輟蓋結習然也後以失審重案遣戍行有日矣所屬士民聞之遠近惶駭奔走相告爭願納餞爲先生贖罪俾得奉親歸養當道上其事賴天子聖明得如所請於時大江南北自士夫以至婦孺靡不交口稱頌僉謂凡此曠典非先生之治行

上結主知非先生之德澤深入人心烏足以致此其爲詩也言近旨遠或於行役卽景興懷或於公暇比物言志歸田後翛然物外有時亦寄情山水與朋傳相贈答其忠君愛國之誠恆流露於楮墨間而不自覺向使先生得志於時則以其章句登諸廟堂被諸管絃以潤色天子太平之治而從容進戒於周公召公尹吉甫諸臣之列爲邊鄙生色豈不甚盛而先生竟閔默終古僅以詩傳也亦可慨已雖然太上立德其次立言先生兼而有之其亦可以不朽矣是集原板昔燬於兵今則世變滄桑尤易散佚其外曾孫王襄臣少將誦習先芬感焉

夔之亟謀再付手民屬予爲序予旣夙重先生之行誼  
而又與襄臣交最善重違其意不敢以不文辭爰綴數  
語於後以誌景仰至其詩格之高詩律之細則桐城姚  
先生甯州劉先生前兩序已盡之矣茲不贅民國四年  
歲在乙卯仲冬月昆明後學倪惟飲謹跋



附錄

上諭

嘉慶十二年二月十八日奉硃批另有旨欽此同日奉  
上諭初彭齡奏據懷遠懷寧建德霍邱四縣士民先後  
籲懇代參令沙琛繳銀贖罪初彭齡細訪該參令所蒞  
任各邑均著有循聲應否准予贖罪據實奏聞一摺沙  
琛前因署霍邱縣任內於逆倫重案未能審出實情間  
以軍臺効力本罪所應得茲初彭齡奏懷遠等四縣士  
民均呈懇捐銀代贖可見該參令所到之處俱有惠政  
及民故獲罪後猶願代爲贖罪但其平日居官旣好此

次獲罪之由祇係承審不實尙非私罪竟可免其納鍰  
所有該土民等情願措繳銀兩尙未交納卽諭令停  
止若已完繳著卽發還所有參令沙琛著加恩免其發  
往軍臺効力伊雙親俱已年老著該撫卽飭令回籍侍  
養以示朕孝治推恩之至意欽此

初撫憲代沙邑侯贖臺奏摺

奏爲據情陳奏仰祈聖鑒事竊照原署霍邱縣知縣沙  
琛因縣民靳鄰民聽從史三將伊父靳同萬殺死該縣  
並不虛衷研鞠率行詳報緝兇嗣接任知縣王馭超審  
出實情經前撫臣成於十一年九月參奏奉旨沙琛著

發往軍臺効力贖罪欽此。前護撫臣鄂卽轉行遵照在案。臣抵任後據該參令之父沙朝俊以年迫桑榆不忍伊子遠戍情愿回籍變產代子贖罪。赴臣衙門具呈懇求臣查該參令於逆倫重案不能審出實情幾致梟獍漏網情罪較重且滇南路遠回籍變產往返萬有餘里例限必逾當卽嚴行批飭並催令起解。去後嗣據懷寧縣士民方益謙等建德縣士民徐鳳起等霍邱縣士民竇大醇等以該參令前署懷寧建德霍邱等縣均有惠政及民今奉發軍臺上有雙親年逾七十萬里歸途無侍情甚可憫回籍變產復鞭長莫及情願贖金代爲贖

罪俾遂烏私臆列該參令政績具詞呼籲並據廬鳳道  
德稟據懷遠縣紳士孫素等亦稟同前情併據各紳士  
投具認狀繳銀六千兩限兩月內完繳臣細訪該參令  
所蒞之邑均著有循聲是以士民等於該參令去任後  
猶復追慕察其情詞愛戴之誠極爲懇切臣不敢壅於  
上聞謹將懷寧等四縣士民原呈另繕恭呈御覽應否  
准予贖罪之處出自天恩爲此據實恭摺具奏伏乞皇  
上睿鑒謹奏嘉慶十二年正月二十八日拜發二月十  
八日奉硃批另有旨

撫憲初勳論安省屬州縣文

夫無所勸而爲善無所懲而不爲不善豪傑之士也有  
所懲而不爲不善有所勸而爲善中材之士也此雖學  
者進修之業殊塗而同歸卽吏治何獨不然夫影纓紆  
組之士莫不欲自奮於功名而循良者莫之槩見豈非  
以奔走風塵自度無由致通顯兼之科條燦設小失檢  
則罣吏議未獲邀赦過宥罪之殊恩志氣消沮罔克自  
振拔且謂斯民爲愚弱或愛之而不知感卽虐之而莫  
與誰何遂相與容頭過身以香泚厥職乎哉嗚呼其亦  
不思甚矣我國家列聖相承登三咸五今天子覆幬不  
旨灼見迪知凡在四海之內遠溘荒陬一有能敷政不

龐民懷其德者莫不蜚英聲騰茂實譬錐之處囊其末  
立見若近者免成沙琛擢復左輔絲綸渙汗炳耀寰宇  
矧同隸皖省尤共見共聞者哉書曰天視自我民視天  
聽自我民聽論語曰斯民也三代之所以直道而行是  
豈作而致其情哉感於所可好而好之感於所可惡而  
惡之發乎情之所不容已而無復展轉顧慮於其間所  
謂直也卽以沙左二令言之固不過少少勤厥職自念  
未必無遺失其視古之卓魯龔黃諸大賢以盛德化民  
者相去蓋不知凡幾而其民已愛之敬之頌之傳之其  
去則留之思之過則諒之又爲之號呼奔訴求所以免

之民亦何負其長哉藉曰要結其民應之者當不過一  
二人且夙昔有痛於民勢旣敗而屈意干之增自辱耳  
又何應焉况欲削股其衣食之資置家事不復顧奔走  
數百里爲之營謀耶故好惡莫公於民亦莫恕於民攝  
官者聞之可爲感悅而憫悼之用泣下也是故古之聖  
王人情以爲田伏維我皇上之不遺一善也如斯而民  
之愛其上也又如斯士苟得承乏一官卽所謂千載一  
時不可逢之嘉會苟其簠簋不飭曠瘁厥官長惡不悛  
者斯民有公論不可以爲人白簡具在國憲不可干已  
其或思自奮於功名則遭際盛時卽無果達藝從政之

才第舉服官之常訓恪守清慎勤而力行之必有所表  
見於當時不致泯泯無聞以終老也左令旣復官終或  
克致通顯惟自勵卽沙令去職其父兄族戚鄉黨以其  
事爲榮四方傳之咸爲美談昔之贊其幕與給其使令  
者皆藉其光寵樂共道之此亦吾人快意事耳且夫勸  
懲不必在中材見賢思齊又欲出其右亦豪傑者好勝  
之情也願諸君子共圖勵之他日奏中和樂職之詩上  
聖主得賢之頌凡敬有官拔茅貞吉本部院幸備位於  
茲將以示人曰是民之所戴而天子所葵者皆吾僚友  
也固亦與有榮焉尙各勉旃且幸諸君子之有以教我



也

懷寧縣紳民呈請捐贖文

具呈安慶府懷寧縣職員方益謙生員王雲嵐管森蔣  
序恭張厚載江其芋王新第王文泰宗長人方蘭職監  
楊瑞黻監生吳觀達錢鳳麟等爲一青堪憐百身欲贖  
環求捐貸瀕懇奏聞事竊惟潛鯉驚鱗流水爲之拂抑  
翔鴻鍛羽行雲於以徘徊物苟習而相安情必感而難  
已况乃叔向之能可宥非止及烏隨會之德尙存將同  
愛樹能無溯慈良於往日圖報効於今茲職等伏見前  
署懷寧縣沙琛蒞職廉明居官慈惠攝院兩載聿著循

風奏治七鄉式稱良吏戢彘強之狙獠閭里相安急賦  
役之供輸追呼不病發奸摘伏誣陷以平望影揣情詐  
欺胥釋作大堤於竹墩之野免於漂搖者千百家錫嘉  
名爲永慶之圩賴以農桑者四十里訟簡而民皆樂業  
官清而吏不舞文以及歷攝符封莫不共銘德化今以  
霍邱斬案合依律令論戍軍臺誠知議屬官箴未敢邀  
夫曲貸事關國憲無從乞以私恩惟是沙令上有雙親  
年逾七秩萬里之歸途誰侍二年之戍役堪驚士民等  
合邑黎庶向依德宇均沐仁風情願集腋成裘釀金贖  
罪俾遂烏私之愛藉抒鵲擁之忱爲此籲懇大人下鑒

與情上達天聽照例捐贖勒限繳完則桑榆暮景得遂  
其愛日之誠桃李前蹊克致其栽花之報矣望思上稟  
具稟安慶府懷寧縣耆民余東啟劉萬和馬伸來等爲  
縷敘愚忱公懇憐鑒事緣前縣主沙署理懷邑兩載居  
心仁厚蒞政清勤不徇人情不執己見四民控案隨訊  
隨銷刑不濫淫斷無枉屈徵銀米書吏未有苛浮動輿  
修工食從無刻減七鄉市鎮曉諭諄諄使物價不敢任  
意低昂制錢不敢私扣行用強頑戢志盜賊潛踪訟獄  
寢衰閭閻樂業而且歲逢水旱尤恤民艱不避風塵躬  
履勘驗爲災爲熟罔或混淆是以聖恩分別緩徵身等

均沾寶惠竹墩濱江田地一遇漲發田舍盡淹親率築成大圩堵障江湖今名永慶凡此治績俱在人心無如續調霍邱因公受過應遵例議謫遣軍臺足徵功令森嚴不庇有位身等微賤咸服公明但念前縣主沙素勵冰操宦囊如洗現在雙親耄老未返滇南慈孝一堂憂思百出身等胥叨舊愛父母瞻依今將骨肉遠離見聞心惻誼難恕置寢食何安仰惟大憲大人文德廣敷官民共戴力能錫福功可回天爲此縷敘愚忱公懇茲鑒罰雖應得情尙可原大施再造之仁准予捐贖之典則身等盡心竭力闔邑輸金照例完繳將見前縣沙獲養

親於膝下而身等釋眾感於目前皆大憲大人天高地厚之恩有以矜全於格外也身等冒昧不勝懇切待命之至上稟

建德縣紳民稟請捐贖文

具稟池州府建德縣生員徐鳳起管絃歐陽狝徐祖祥歐陽觀童超盛大鵬楊廷勳監生徐述崙程一元徐先馨職員鄭鎔等爲青災可憫宥典思援俯訴輿情仰祈奏聞事竊謂蛇解銜珠曾思報德蟻能齧械亦欲酬恩駢娟蠕尚識感銘豈士庶莫知愛戴伏惟前署建德縣沙琛清廉律已慈惠加民廣培植於士林積月有觀風

之課定章程於保甲經年無滋蔓之虞撫字無慚於安  
輯催科非迫以追呼發伏摘奸鋤強剪暴值大案則寬  
貸株連遇疑獄則平反誣陷凡諸政績胥治民心祇以  
代庖而治遂將束轡以行惟建邑實需此賢雖愚民難  
爲斯別垂髻總髮願紆已授之綬連襪袴裳冀緩方遭  
之軫維時藩憲諭以舊章例所難行請而未允然下邑  
惜寇恂之去而隣封喜廉范之來以故歷膺吏治聿著  
循風乃因霍邱一案譴戍軍臺執法則不可原情知仁  
胥本於觀過况乃帟帷倚養壽逾稀齡襍被解親途長  
萬里念萍分於此日悵瓜代以何年生等均沐栽培咸

承教育特輸縣力用附捐金伏乞下孚民望上達宸聰  
俾得永奉春暉重開覺路則枯苗得雨沙令幸邀覆裁  
之恩而飲水思源士民亦効結銜之報矣

霍邱縣紳民稟請捐贖文

具稟霍邱縣職員竇大醇生員王懋德耆民田多稼王  
秉鑑等爲感激陳情籲求附捐懇乞奏聞事前攝霍邱  
令沙琛精勤效職慈愛居心蒞任而安善良下車而清  
利弊閭閻樂業頑悍潛踪雖木損金饑亦逢水旱而途  
奔壑轉常賴生全訟理而刑自清肌膚罔害官閑而心  
無暇廢墜畢興宿人猖獗偏近安豐霍境戒嚴保障淮

岸今因本邑斬案譴戍軍臺咎在疎虞議歸允當誠難  
逃乎國典敢遽訴夫民情但以沙令上有雙親迎來數  
載滇南路遠誰侍萬里之歸途塞北霜高冀免三年之  
論戍情真可憫過亦堪矜原夫沙令之獲愆本以霍民  
之不肖傾囊囊以捐贖無如兩袖風清悵骨肉之分離  
長此一身蓬轉職等素霑德化切悉情形每思得罪之  
由一眚莫掩或從原心之例百善可償爰是來省叩祈  
憲鑒到省後聞懷建各縣業經具稟捐金請贖已蒙批  
准在案惟是懷建兩縣認繳贖項六千兩現已呈繳三  
千未蒙提貯職等亦願附捐千餘金湊足六千之數惟



冀俯采輿論代乞天恩俾沙令得免戍役留養老親實  
爲德便

懷遠縣紳民呈請攢金代贖文

懷遠縣翰林院檢討銜孫素舉人閔長青生監耆民楊  
士緯等呈爲追錄前功恩求格外攢金請贖籲詳奏聞  
事前懷遠令沙琛屢以樹績有聲調署懷寧合肥霍邱  
六安等處十一年秋因霍邱任內一案參奏發軍憲効  
力伏思嚴吏治以肅功令計罪允足相當然士民等竊  
有請者周官弊吏奪以馭貧虞帝明刑金以贖過果其  
才稱練達識亦宏通握瑾瑜者寧摘微瑕采葑菲者無

以下體周全善類愛惜人材能不致望於大憲哉請略  
陳往事希垂鑒焉懷巨地接淮淝歲多浸漲淹禾漂麥  
十室九空飛雁哀鴻天涯地角惟嘉慶之六年沙令蒞  
任伊始日抱難安之隱憐茲無告之民溥置衢尊廣捐  
佛米倡素封以樂善搗丹藥以起痾元氣初培人心胥  
悅言旋言歸復我邦族者蓋不下萬餘戶矣過之可原  
者一也歲行在戌宿匪縱橫沙令捐俸招募義勇訓練  
馳驅保完安集當倥偬戎馬之時路不拾遺市不易肆  
藉非培養深厚能如是乎旣乃伐李晟之竹盜無藏身  
運虞詡之斤根鮮錯節是以各屬有流離之苦商是邑

無鋒鏑之驚過之可原者二也且三楚多剽勁之風而  
平阿實荏符之藪沙令手殲渠魁誠開良善恤緯而鼠  
何穿屋讓耕而牛豈蹊田鄉置儒師月朔則躬臨講貫  
家知絃誦春深而人獻芹藝視彼以鳳易鷓賣刀買犢  
有過之無不及焉過之可原者三也况夫敦崇儒術培  
植士風定甲乙以程文教詩書以毓秀榘楠杞梓頗多  
有造之才翡翠珊瑚亦屬大成之器凡此菁莪茂育實  
由教養兼該過之可原者四也若乃椿萱年暮桑梓途  
遙子厚遠遷誰堪負米少游被謫莫詠循陔萬里藍關  
一雙白髮在翼麟鹿鳳之廷尤當聞而心惻也過之可

原者五也。因此合屬士民等呼天請命，早望遣我使君  
泥首陳情，竊願重瞻父母，伏冀俯順輿情，仰邀慈鑒，下  
以慰愚夫婦孺慕之忱。上以廣聖天子作人之化。若待  
壯士投邊驪駒出塞，而蔡挺旣老，定遠思歸。沙令縱翹  
首玉門，究何補聖恩於萬一哉。干冒呈叩，不勝惶恐待  
命之至。

懷寧贖行原啟

夫思人愛樹棠陰，亦載其恩。睹物知仁，黍雨且留其惠。  
奉百錢於劉寵，進萬紙於杜暹。二軍有羨而之，祈一邑  
或攀轅而泣。莫不徘徊去日，感激當年。臨歧路而銘恩。

佇清風而報德况復名傳召杜聲藉龔黃因偶絳夫彈  
章遂卒從夫吏議待命遐陬之外出居遠地之間屈坡  
老於黃州窮愁莫訴貶昌黎於嶺表瞻望誰憐則豈徒  
寒恤范睢應有故人之意慰思李晦不畏姻友之嫌者  
乎前攝吾懷邑篆滇南沙雪湖明府詩賦儲韋文章燕  
許起家聲於廉孝溯治績於循良奏縣譜者已數州令  
院城者將兩載下車伊始人卽頌爲神君游刃有餘政  
早殊於俗吏平反誣陷信發奸摘伏之如神寬貸株連  
咸樂業安居而不擾置千家於安堵則犬吠無驚戢一  
境之豪強則貪蠹悉屏若乃庭無留獄吏有餘閒催科

絕暮夜之呼撫字遍春陽之煦但使圓常似鏡何藉喧  
囂敲比之爲縱其焚盡如絲悉歸理解體髀之奏築長  
圩者四十里卽江鄉皆化桑田保永業者千百家使澤  
國皆成樂土至於文宗初莅多士爭來因赴試於郡城  
偶觀優於廟舍人酣若噉致滋攘臂以呼吏怒如霆幸  
賴霽顏而解脫繚綆而使之內愧出壺殮以救其餽饑  
凡諸治行之彰彰具見循風之卓卓方冀寇恂可借共  
瞻政績之有成爭如郭伋難留莫慰民心之共屬乃者  
一朝絳誤萬事屯遭別羽高鴻竟於飛而垂翼翔霄遠  
鵠忽入世而嬰羅傷堂上之雙親歸途萬里悼旅中之

隻影成役三年公私當竭蹶之交車馬屬倥偬之會平  
日洛陽親友久相對於冰壺此時萊蕪士民豈僅歌夫  
塵甑夫受壺漿者不忘惠資拯濟者不忘勞况明府惠  
在吾民勞在吾土合將伯以相助呼邪許以爲功雖非  
一木所能支要屬眾擎之易舉我等是用粗陳德政遍  
告城鄉共助斧資聊當祖餞俾得奉椿萱於舊里効奔  
走於邊隅倘獲代瓜時再培花縣則野亭來宿當更蒙  
福曜之臨竹馬相迎必快睹前星之照矣

建德贖行原啟

聞夫郁苗召樹人思遺愛之存瑞草瓊枝吏報循良之

最贈去思之何武囊解金貂送來辭之陶潛樽浮綠蟻  
匪臨歧而卧轍卽當路而攀轅此皆德惠及人足使謳  
思載道况乎初衣未遂偶掛彈章遠戍堪憐難從末減  
望崇山而心悸涉沙漠以神驚夫孰不感激當年欲挽  
鄧侯之駕徘徊歧路共傷皇甫之行者乎前攝吾建邑  
篆滇南沙雪湖明府意氣元龍文章司馬曲江宴罷旋  
製錦於蘭谿積案風清兼衡文於雲石法術本乎儒術  
養民重以教民乃受其治者四鄉不待五申而三令何  
固吾圉者半載遽然一歲而九遷悵撫字之無人懼科  
催之日擾雖切歌思誰嗣羣上慰留郭伋之書爭如福



澤無多莫遂懷想王規之願盼沿途之祖帳從者如雲  
飲歌路之行樽涕還如雨顧或佇遷音於日下降寵命  
於天邊庶幾睹政績之有成慰民心之共屬耳無何遽  
從吏議當赴軍臺甌無萊蕪之塵匱乏孟嘗之劍一肩  
行李高堂則刀七難供萬里飄萍遠道則斧資不給此  
固二廷之所泣別而實眾姓之所悲離者也茲當車馬  
倥偬離愁莫訴况是風霜剝落瞻望誰憐讀皖江餽遺  
之章已酬厚澤愧蘭水薰陶之輩未罄鄙忱用是敬啟  
城鄉共傾囊橐雖細流之能成海而眾腋可以爲裘倘  
邀碩果之名率獲及瓜而代行見山城水郭或再蒙福

曜之臨蒞屋茹簷當必有淳風之佈謹敷鄙引祈署鴻  
名

霍邱闔邑公啟

雪湖沙父台於嘉慶甲子歲來署霍邱篆以清慎和緩  
爲治以仁慈惻隱居心禮紳士如賓愛百姓若子平反  
誣陷寬貸株連撫字見其心勞催科慚乎政拙置干家  
於安堵戢一邑之豪強莫不有神君之頌父母之呼方  
冀召父旣來寇君可借孰意過繇疑獄謫赴軍臺堂上  
雙親空盼歸途於萬里旅中隻影長驚戍役以三年凡  
我紳士軍民人等或仰承其樾蔭或久愛其棠陰莫不

感激涕零急思援手爭奈呼號有願援救無能百計欲  
圖一籌莫展乃聞懷寧合肥建德懷遠等縣曾沐沙父  
臺之恩者咸攘臂爭呼公奮義舉或攢積其臺費或捐  
贖其罪名或代完其宿逋或共資其薪水無不銖積寸  
累集腋成裘况我邑侯身爲敝邑受累萬事迺遭寧反  
忍視同秦越耶嗚呼泰岱不棄土壤故能成其高河海  
不擇細流故能成其大我等爲此廣懇士農工商軍民  
人等各爲量力或輸朱提數兩以及百兩固爲拯人之  
危或捐青蚨數千以及一百亦爲濟人之急務祈速卽  
彙交以便我等公赴轅門呼籲哀懇庶於事有實濟勿

托空言謹敘

懷遠縣闔邑公啟

昔劉元侃遭貶嶺南都人士送者如堵裹金釜集曰吾  
曹不得親送使君祇此代洛陽一勺水也聞者泣下今  
吾邑沙賢侯雪湖調署霍邱因公罪誤騰發軍臺効力  
自本朝吏治考嚴安得不如此乎尸子曰根於道者迷  
於察孔子曰觀過斯知仁矣輕重之衡審哉審哉懷邑  
素稱尚義之邦回思三年前撫字勞心厚澤在人不僅  
門墻之士興歌黃鳥能不愧然盧次梗莽男子耳謝茂  
秦行泣於市哀感當途况羣公之力十倍茂秦而賢侯

實出次梗萬萬哉塞漠盲風冰元地裂爲人弟子而令  
尊親蓬首沉砂王郎腔血定向何處灑耶因此倡義公  
捐臺費倘大憲恩援留代開復亦唯命縱不獲已雅雨  
先生所謂二年便許朝金闕萬里何辭出玉門以爲異  
日酬恩之券可也古大英雄運際迥遭終當熙奮如蘇  
海上海上歸來李長源衡陽再至烏孫之返張鼎百越  
之名青霞因禱得福轉敗爲功烏知今必異古所云也  
山豈擇壤腋可成裘俾賢侯得遂安全而吾邑性天之  
良不僅名高任俠已也謹啟

六安州公啟

紙醉金迷之地宦海多驚杯殘炙冷之場情田益熱撥  
鉢盆而種火涼臺馴致生溫活枯管以嘘春杏縣忽逢  
聞喜嬰羅網解仍飛鄰令之鳧脂轄膏分不繫藍關之  
馬眾擎力重再造恩多此則釋殍丹陽麥舟奚惜求糧  
魯肅米廩不辭者矣有如前署州沙郡侯也詩社長城  
文壇上選興廉舉孝噪芳譽於滇南著績論功播賢聲  
於江左策名院伯十三州半踏陽春佐治咎繇七八月  
宏施霖雨下車未久人頌神明保障爲多余呼佛子俄  
乃彈章公謨甘自墜其魚符執牒上聞且遣行平雁塞  
盼堦前之赤子嗷嗷驟失所依嗟堂上之衰顏痺痺不

遲來諗二年戍鼓淚灑青山萬里慈幃魂驚白髮坐使  
忠宣對榻悲深風雨之思德裕題箋愴賦窮愁之志良  
足歎惜祇益歛歔既有懷民卧轍援借寇以請留大憲  
憐材鑿攀侯而欽恤赦有司小過鼓舞賢才體保赤愚  
誠瞻依父母如天之福袞衣遽息風雷濟民之生芘黍  
續承雨露然而秦城不易誰持趙璧以歸荆璞難完未  
雪卞珍之刑是時也百錢待納五用莫輸滄海窮鱗懼  
失漢潢之潤監河枯鮒權資升斗之需平時釜甑塵生  
清冰自飲到此囊橐金盡涸轍滋危茲旣齋澗於皖江  
更望分流於溟水全憑銖累共効困傾浥彼勺泉發河

海一源之願堆將拳石積泰華九仞之高我等膏雨夙  
沾壺餐共沐論報施而勿爽以感戴而彌真覆篲爲山  
將金鑄錯得似點金布地結此因緣先教司祿朝天消  
其咎戾續集成裘之腋玉成磨玷之圭捨百身以贖良  
人此是千家愛日遍六城而依慈母合當兩度春風



點蒼山人詩鈔卷一

雲南叢書集部之三十五

太和沙 琛獻如著

秋懷

西風搖芳蘭木葉下如滌元雲無停影繁霜被原隰攬  
衣臨高臺秋氣何淒惻白日積古今朝朝悔昨昔駑馬  
介不馳蒼鷹韉欲擊感物多所懷分陰自悚惕自非至  
人心安能守元寂

擬古

高樓隱春樹白日垂簾櫳上有鳴機婦顏色桃花紅娥  
女五色絲鳳梭聲玲瓏修眉不拂拭細意營初終天花

下雲錦婉婉雙盤龍光華爛日夕一泯組織踪所思在  
遠道欲寄渺無從綿繡豈不重纏綿結我胸持攜坐客  
與羅衣揚輕風願將隨飛霞流君衣笥中

君章詠

君章儒術士抗言悟新莽脫身弔重華九嶷掘衣上侃  
侃誓暴師人鬼釋搶攘功成擲組歸恥以軍功賞焚焚  
董子張負讎愧俯仰欲語摧心肝歔歔下泉壤起身擊  
仇頭與子視無爽汝南冠蓋馳十月盛筵享牛酒奉僞  
德同聲和褒獎突兀舉觥前披鱗折朋黨危行似忿戾  
守義近木強恕已何婉約沉機類洑蕩區區東門候閉

門進忠讜宮闈化危疑骨肉得依仗何乃麾遣守坎凜  
困芒長神龍不一德威鳳戢遺響橫經羅生徒蕭然卸  
塵網有漢豈不盛負彼伊呂想峨峨弋陽山泉石皓滌  
澗緬懷鄭次都高風竟長往巢許不足爲誦論生慨慷

頽雲歌柬師荔扉廣文

石得之洱東樵人高二尺有咫頂攢簇五峯大  
小皆右折左亞以層巒虛其脅連環數大穴小  
峯離離外吐右斜垂一幹長尺半作連蜷起伏  
狀而翹其末石大小三十餘穴皆洞達空其趾  
如鼎足色蒼然師荔扉驚見叫絕數請易之爲

名之曰頽雲也

香雲出海環邱紅巖稜百疊堆奇峯鯤鵬變化怒搏羽  
海波壓雲雲偃風橫披側出湧其鋒元氣鬱結青濛濛  
雲將猖狂扶搖東蓬萊清淺鼇衰癯師曠鼓琴變當空  
揚沙憾林聲砰諍忽然摧落嶠山星池之浮石騰擎天  
矯如奔龍光芒百丈乍卷束冰凝雪沍盤崆峒起伏迴  
環趁遠勢浮煙噴雨青搖溶盛以瑤盆藉碎玉當軒四  
面開玲瓏師宜仙人過我飲盤旋大叫神耽耽云是點  
蒼山頭半頽雲欲頽不頽雲閃閃君家點蒼下日日慊  
慊覽易馬請從王蘇例欲奪仇池難手擘昨夜小園風

雨疾落花打窗如舞雪却恐雲隕竟飛去使我園林坐  
蕭瑟咨余寂寞嗜好偏煙霞泉石耽周旋奇章贊皇太  
豪貴誇楊攫米殊狂顛適然寓物得我意紛紛物轉寧  
自慳雲頽雲起石悠然支離恢詭全其天

同趙所園何得天遊蕩山至波羅崖觀佛跡

遠響寂鍾魚深崖古德居巉石蟠空宵歸雲注壁虛花  
沿羣鳥獻樹偃毒龍吐道力相勘驗探奇興有餘

登中峯頂

浩浩風輪轉夜摩深崖佛跡有盤陀排空鴈陣縈雲背  
過雨雌霓滄海波雪影依微中印度夕陽飄緲蜀岷峨

側身今古知何事莽莽遐荒扣石歌

龍女花

優波離女鉢呈花聽法毗樓示現遐雪裏孤芳森貝葉  
天然素貌憶彌家香飄金粟濃雲氣露冷銀盤射月華  
直揭妙明心一點花開眞見佛陀耶

要楊虞功計偕宿蕩山寓樓

楊子悲岐路微疴怡養生於山得眞趣遯世不居名蒸  
火藥香滿掃雲松響清流連惜遠別信宿倒瓶罌

無題三首

朝霞明豔睽手瑜双裏飛瓊異繡襦自分渡頭匏葉苦

情知天上桂花孤，分嬌願在奩爲鏡。  
解佩親貽臂繫珠，十二玉樓中更遠。  
鶯聲樹影翠模糊。

華胥環裏境迷離，契契勞情夜漏遲。  
青鳥祇隨釵燕轉，翠蛾空向鏡鸞窺。  
春藏得地花重疊，風定垂簾月遞迤。  
知否河陽人似玉，忍寒端爲寫相思。

冰扇徒聞雨絡絲，巫雲洛雪本難持。  
殷勤張碩留盃在，倚徙蓬球啜露飢。  
月底花嬌依鏡近，樓頭眼語入箋疑。  
冶容莫把芳香妬，五色華蟲蘭自知。

古別離

從來富貴比風花，茵席泥塗一颺差。  
還似人間離別意，

長亭杯酒各天涯

邯鄲懷古

邯鄲鼓角動地鳴援師鼠首窺秦兵  
朱亥揚椎噴嗜糜  
選軍八萬雷電轟侯生計日北向死  
酬恩兼爲酬擊鄙  
公子從茲趙可留趙存魏重秦謀弛  
當年頗訝執轡恭  
抱關老翁有如此君不見平原賓客  
夸盛時脫穎自失  
囊中錐何地奇士不時有能知奇士  
士始奇毛公薛公  
何爲者公子不來誰知之嗚呼公子  
不來誰知之

鄴中懷古

銅雀臺岩對墓林分香遺令暗情深  
明明國計無多語



抵死猶謾篡漢心

醉酒弛儀早自頽詞華瑰豔總含哀興亡一哭君臣義  
畢竟輸他介弟才

廣武原

絕澗臨相語聲呼肅兩軍英雄甘一戰天地不中分劫  
盡咸陽火人歸芒碭雲徒教千載下成敗論紛紛

漢江曉霧題大堤水榭

大堤紅亞花朦朧砑砑柔櫓鳴虛空曉意欲雲雲不雨  
捲簾一片青濛濛美人攬鏡籠紗裏失却窗前山邈迤  
低回卽意不分明一下紅樓幾千里

荊州

仲宣懷土此登樓，騁力高衙願未酬。  
沅芷澧蘭芳草歇，蘆花楓葉楚天秋。  
江風也有雌雄勢，人事難憑出沒洲。  
今古茫茫交百感，陽春誰和郢中謳。

虎渡口

鼓柁風濤壓遠林，渚宮塔影半浮沉。  
金堤猶聽陳遵鼓，息壤長留夏后心。  
隱蛟螭餘狡窟，嗷嗷鴻雁集哀音。  
大川舟楫談何易，桑土綢繆迨未陰。

澧州渡

碧漲寒初落，郵亭綠樹中。  
冰魚噓日上，山果冒霜紅。

景怡行客歸心倚漸鴻  
澧洲三渡接延佇猗蘭叢

桃源洞

曲折溪流接短亭  
遲迴疲馬聽泠泠  
荒村人靜煙生竹  
野渡船過鳥下汀  
古木交陰孤徑窄  
秀峯奇構萬重青  
絲蘿一夜遊仙夢  
却訝巖前有洞扃

辰溪早行

溪深遲曙景霽色滿  
高峯霧重冰生石  
雲消雪在松衣  
塵蒼翠溼野饌筍  
芝穠却訝荒山估  
棲棲亦似儂

紅葉

欲寫幽懷一葉書  
葭蒼露白眇愁余  
西風瑟瑟深林晚

紅影蕭蕭返照疎，烏柏門前人別後。  
雙楓浦上鴈來初，詩人持比春花好。  
却憶花時興有餘。

鎮遠

源盡五溪西，長橋落斷霓。  
嚴城當石鎖，巒路仰天梯。  
世界恆沙簇，馮生泡影迷。  
利名無險阻，短艇接羸蹄。

飛雲洞

黔山歷遍厭征騑，幽洞玲瓏得翠微。  
石意作雲垂欲下，溪風吹瀑擁俱飛。  
媧皇五色天餘煉，巫女陽臺夢懶歸。  
勝境遠藏邀遠空，教行客戀巖扉。

牟珠洞

大化偶示幻毓此巖洞奇容光落青天萬象森陸離巖  
然石浮圖莊嚴無偏敬鐘鼓各鏗鏘幢旛交參差彷彿  
十六賢凝神仰迦毘天雨亂花落活潑佛者機遊人眩  
五色夢影逐低迷纍纍珠中蟻九曲有餘嬉古佛大笑  
矇是名諸相非妙哉此空空四輪共一癡

雙明洞

鴻蒙析天地凝滓浮泡聚沫山纍纍元氣偶然盪不收  
金石飛騰混沌死地肺四達青城空洞天福地遙相擬  
鎮寧城南日東升飛霞直渡青磐底旁壙曲戶開重重  
中衢竟闕城門軌石氣蒼蒼非想天月窟光寒雨花紫

巖東漱穴碧沉沉傳聞暗徹滇池水巨魚掣鎖鏤昆瀾  
荒蕩誰能究此理僧徒標異比雷音仙靈豈盡貪奇詭  
伐竹梯梁好事人那得窮遊到邊鄙野人驅犢洞中歸  
鶯花一塢煙雲裏

憶梅

十載青春一瞬移更無人在款花卮呼門欲乞花間坐  
曾與梅花是故知

桃花

萋萋殘紅亂雨枝漁郎重到艤舟遲垂楊也爲飛花惜  
疏盡重重水面絲

刺桐花曲

刺桐花開紅簇簇花裏青樓春酒熟低枝繫馬葉幡幡  
翠袖壓杯花映肉欲行不行驄馬嘶撲鼓飛花點客衣  
七月廿三日汨河兢渡

蝸角興亡一瞬移堅貞猶自惜蛾眉畫船煙火連村社  
土樂嘔呀競水嬉息國桃花嬌不語綠珠金谷恨難追  
蒼山古雪長年在搖蕩清光漲綠漪

鶴慶山中眠龍洞黃冠塚諸蹟

空山寂寂亂雲迴樹杪精藍扣戶開火路草蘿披夏雪  
奔流石窟殷晴雷荒墳白骨烏號墮古洞淒風杜宇哀

畢竟空王天地闊茫茫京國冷殘灰

瓶梅

飛雪隨風撲紙窗羅帷香動恍聞鐘  
乍轉銀瓶影的歷梅花蒂盡雙

溪雨

曉郭煙嵐溼翠微山頭瀑布掛晴暉  
春風忽送溪雲出亂捲銀瀧作雨飛

春渠

小樓密雨夜悄悄碧草如煙浸遠潯  
山下桃花山上雪併成春水入瑤琴



春陰

檢點飛花第幾重  
曲池芳樹翠茸茸  
輕陰不作閒風雨  
恰好海棠春睡濃

梨花

嫣紅姹紫豔交加  
蕭酒高枝只素華  
朗月樹深雲蕩影  
春陰香動雪團花  
洗妝凌亂銀杯促  
插髻玲瓏玉蝶斜  
記得廣寒翻曲譜  
伶園絲管出天家

漠漠幽芳藹藹春  
工淡雅寫天真  
光風洛浦初迴雪  
素影東牆恍有人  
蜂藥細黏珠粉溼  
燕泥輕點堊痕新  
多情最是遺山老  
孤潔深憐靜女顰

剪雪裁冰色盡刪迷芳吟客認雲攀輕盈欲假封姨薄  
冷豔低籠月姊閒杜曲遊塵衣上雨嘉陵詩夢馬銜山  
行酤我憶餘杭姆釀取飛花蕩漾問

寒裳

寒裳潦洎漫遷延桃李難藏地遠偏紫陌春塵迷屬睇  
錦屏霞暈隔佳眠語麻三葛疏當紙點滕芙蓉骨念蓮  
奈何盛年難再得折瓊還與致纏綿

馱牛嘅

斜月墮長坡踏踏人影直曉霞溼行塵山煙炯虛白隆  
隆牛鐸聲負馱不負輓野八事機智陋彼田夫力連綿

百千蹄程規倒昕夕巧利析精微芻秣就山澤人世逐  
熙攘艱難在荒僻誰知皇古民老死不作客

六里籌宿憶己亥鄉試鐵橋頽阻水二日有當壚  
婦禦強暴甚快異事

山風一徑響關河長短亭臺萬綠窩幹嶺蜿蜒駘運足  
馱綱驟馬蟻緣柯癡龍掣鎖沉天塹法姊分鐙懾地魔  
過眼雲煙消往事磨牛踏踏舊涉多

仙人巖

沉水下無際聯巖高截天云何仙人居巢架虛碧間曲  
折三十里往往留空椽縱橫插石穴複閣仍鈎連有戶

或開闔有橫緘且鍵長劔倚深壘不漬苔蘚斑雲氣蒼  
崖角隱隱停虛船風雨所漂搖千載屹不顛仙人信詭  
異何乃不憚煩或云古營窟建自洪水年絕壁無坡陀  
昏墊何由攀二酉近百里將無藏膏肓孰居無事是守  
之食與眠臆度百不似行舟俄逝邁伊古大山澤草昧  
罕人煙山精有結廬金累亦裝冠山經別歧渾禹鼎鑄  
神姦人世歸耳目誰與究其端四大合幻成滄桑中遷  
遷百靈役大化隱顯千萬般鐵錘出平陸雞穴塞彈丸  
官所不能論證孺成故然仙理妙無著涉有非其佞神  
奇與臭腐幻化常清新浩蕩羣鷗浮樂此漪漣春

壺頭山

箭筈飛聲下急流，  
谿砦大壑壅壺頭。  
白雲倒漾層峯出，  
絕壁陰森古木樛。  
擗笛哀生吹裂石，  
頓軍新息仰鳴枹。  
只今猶恨蠻溪險，  
不斷祠鴉送客舟。

明月山

明月山前明月池，  
銀瀧疊盡碾琉璃。  
奇峯一角欹龍頂，  
丹壁千尋落蜺雌。  
天半樓開人倚鏡，  
林端雲退鳥涵漪。  
輕舟莫憚回環泊，  
欲睇仙臺路所之。

姊妹山

清溪明媚儼仙寰，  
行客忻逢姊妹山。  
眉意淡濃分染黛，

雲網掩映巧堆鬢春花滿鏡凝妝豔暮雨無人夢影閒  
素芷芳蘭思擷采輕帆一瞬隔林灣

夸父山

夾岸雲煙貼水浮三峯突兀繞行舟藏書誰訪周王祕  
爨竈居然夸父留射的石帆虛擬似虞淵若木渺難求  
擎杯滿引紅霞嚼無限奇踪片艇收

穿山石

積鐵層層絕壁牢崖根虛豁走猿獠應緣山石當流齧  
想見洪荒載地高洞口松篁藏落日雲端臺榭撼飛濤  
元光福地知非遠欲扣仙靈引放舫

絲籬山

赤石丹崖被綠蘿波光搖蕩錦雲窠小峯不盡千重疊  
朗水偏回百折多竹圍稻畦環繡錯槎觚篔簹魚歌  
桃源那更人寰外煙靄迷離悵望過

呂翁祠

明星睽睽東方生呂翁祠前車鐸聲茫茫昧昧夢中行  
行人盡說祈佳夢黃塵驚面凝鬚凍眞眞夢夢幾曾眞  
可憐富貴逼行人

無題

凌風仙去怯纖羅眉意連娟不染螺入鏡花鈿含雨溼

繞裙蜂蝶占香多，列松積石銷郎豔。  
曉幕繁霜憶婢歌，強把後期相慰借。  
東方卯歲又蹉跎。

羽帳金支玉軫陳，精誠今已寤眞眞。  
同心苦結垂梔子，好草鈎連蒂落秦。  
錦轡香留邏谷晚，舞裳雲綻若耶春。  
軟紅不見離輪轉，已是凌波絕步塵。

擬結客少年場

夙昔慕劇孟，年少相攀追。然諾急片語，意氣無險夷。  
歌舞宴遲日，一博千金揮。上馬忽如電，射獵南山陲。  
輕身關勇捷，白羽生鳴颺。拔劍擊黃獐，痛飲何淋漓。  
日暮醉酒歸，亭尉相詆欺。三十恥不貴，折節從經師。  
廣聆諸儂。



論法度森嚴規章句細如髮  
斷弛將安施蹉跎歲月淹  
浩歌中夜悲雄劍憶雌鳴  
汗血當風嘶丈夫不滿意富  
貴亦何爲起身尋舊遊行樂  
及良時

長安有狹邪行

春風陽車塵迢遞入狹邪  
狹邪多妖女顏色豔春花  
蛾眉各意態羅衣揚風斜  
芳蘭被約素寶釵曜盤鴉  
粲然啟玉齒光彩流朝霞  
含睇互傾靡斂意凌箏琶  
當筵一曲歌陽春回幽遐  
千金買同心豪貴爭交加  
自非斛中珠何由枉光華  
徘徊不可卽日暮徒咨嗟

猛虎行

蘭不因級佩香木不因中採直直木有本性香蘭無豔  
色豈以志士心中道自惶惑達非爲我加窮豈爲我抑  
逸豫痿腰身嗜欲暗神識險經道乃遠海運飛始力小  
智競目前達人恥徒得峨峨登高山驅馬不遑息緬茲  
千古懷遠覽契前德飢食清水濱寒棲松桂側幽禽對  
我鳴崇雲共我陟長歌猛虎行慷慨鬱中幅

門有車馬客

門有車馬客壯遊輕遠方遠方薄四海欲駕還俛俛饑  
齧山頭藁渴斧堅冰漿三川揚鯨波九坂折羊腸僕癩  
顧我嘆我馬元以黃男兒急功業俯仰增慨慷鳴禽揚

春和鷺鳥厲秋霜  
運會自有時聊且歸故鄉  
老親出門前歡顏得所望  
倉皇走弟昆顛倒書劍裝  
稚子躍我側妻孥羅尊觴  
親交接踵來絮言各溫涼  
解襟振塵土回驚客路長  
寄言遠遊子歸哉樂未央

淶水曲

卽棹過湖來儂船過湖去  
生小兩湖邊能得幾回遇

采菱曲

回棹避蘭津菱歌聲淹抑  
並船隔芙蓉凝睇如相識

采蓮曲

采蓮溼翠袖要得染穠香  
卽從岸上遊只是遠芬芳

東安劉越石墓

驅馬乘乾陽連岡列縱橫浩浩白霜積  
瑟瑟風林聲在昔劉越石城此事西征  
投軀隘天地百鍊磨霜刃完都亦已傾  
孤軍慘泣血長嘯發重圍萬馬散明月  
慷慨窮林吟慰彼資糧絕飛鳥爲哀鳴  
浮雲爲鬱結何乃同盟子信義中道裂  
脣齒結幽井妖氛冀剪滅殷勤報盧子  
竭茲忠孝節一心急公朝黨讎視無別  
邈矣子房智懷哉曲逆奇齋恨卽泉壤  
脫難竟伊誰遺墓古城側白日何淒淒  
碑碣不復識樵牧循荒陂疇憐枕戈心  
死生終不移三復扶風歌爲君奠芳卮

留別東安生徒

涼風肅天野，遠客浩言歸。  
臨行轉惻惻，重與諸子違。  
道同得所契，步履相因依。  
異鄉苦多感，慰茲風雨霏。  
人生重徒侶，况乃知我稀。  
所嗟萬里道，行當隔音徽。  
停雲何渺渺，驪馬揚金鞵。  
珍重贈言義，遲此前途暉。

前題

四載離高堂，定省缺晨暮。  
強顏爲人師，乃今卽歸路。  
人生貴同志，豈必長羣聚。  
名理如坦途，師資在領悟。  
副墨而洛誦，元冥亦景附。  
求馬唐肆中，無乃類膠固。  
小成致道隱，大源力仰沂。  
惜日新，新駒隙，悚聞度刮目後會。

期當非此日故躋躋畿輔居飛黃易騁步勉哉各努力  
勿徒遣人慕

鸚鵡洲

鸚鵡洲邊草萋萋春又生人心與江水千載鬱難平  
鵞鳳何相值茝蘭空復情恢恢天道大漫衍適孤行

城陵磯

長江春盡雨綿綿萬里金沙下雪巔只說洞庭青草漲  
扁舟格是上青天

洞庭順風

渺渺長江水迥波送客舟春風吹掛席飛度岳陽樓  
舉

酒屬孤嶼白雲平溯流月華一千里湘瑟未停搗

湘陰泊

斷岸微茫翁竹煙雨聲滴瀝到蓬船輕風細浪離離草  
鼓遍湘靈廿五絃

賈傅祠

漢世承平日真堪痛哭來無人知此意何自惜斯才楚  
雨晴猶溼湘流去不回荒祠蘋藻薦爲憶弔原哀

鎮遠河諸灘謠

太山腹溪懸水如梯連三篙如箭石如的篙師精誠飲

羽沒石

蜂窩石

石鏢一線仰天三轉刺武溪之礮石或馳

之武溪之剽石或糜之石之齒齒何如夷之

盤

熒熒白

鷺磯頃刻大於鵠白鵠瞥眼飛鷺鷺又來續

大小鷺鷺

黃

猴黃猴長竿捷末母夷猶

黃猴

虎耳崖履其尾行人心

得虎子

虎耳

上高流下高流上下兩遲速一樣白人頭

高流

清浪巉巉不斷灘欲上不上石盤盤青山白石行

路難

青派

### 題鎮遠店壁

山透水玲瓏樓臺向背同  
葑簷鍾乳滴梯徑石脂紅  
佛火明深樹田歌出半空  
忘懷在逆旅隱几洞天中

### 龍場驛



何陋足軒趨良知道業昌遠峯翹馬耳細路繞龍場浩  
氣祛炎瘴微言息跳梁蕙蘭持慰我也惜覆空牆

清鎮諸山

路平山更好難得是巫黔疊嶂蓮花蹙疎峯菱角尖薄  
醒銷馬蹇久旅得心恬獨愛郵亭石玲瓏倚劬簷

安順諸山

應是洪荒始蠡螺激斷鼇紛紛從化石纍纍逐奔濤蝸  
國煙嵐古龍苗洞穴高雲坳春跳月歌管醉噉嘈

夜行

暗壑喧無定空亭得辨津馬蹄撻石火林影突楓人眩

境參真幻冥心勝苦辛前山鐙數點安穩到城闌

阿都田諸山

奇峯千萬狀極意逞巍峨陸海分羅剎坤輿臃疥駝韶  
光消積雨險語逼前坡惟有無何飲雲煙醉裏過

黔雨

泥塗還自笑襪襪羽衣身的皜梅花色淒迷個底春雲  
堆壅鳥道雨意狎龍人應盡羅施界纔堪與日新

黔山蝴蝶歌

竹江花開濃煙霏花間蝴蝶不斷飛似惜行人寂寞路  
聯羣逐隊來依依滕王圖中描不得巧學苗女裙五色

逞將新樣鬪蠻花，孔金翠羽啼鵲血。羅浮仙洞蝶仙遺，  
金筑山奇蝶亦奇。沙坂墨蛾春錫貢不盡，如意館中知  
五華學舍感舊。

靈珠滿握氣闐闐，上舍聯翩盡少年。十載行踪塵滿面，  
五華春夢草連天。便便負腹長安米，寂寂懷人海上絃。  
雨散雲飛音信杳，幾曾真個玉堂仙。

淨蓮寺

寺有泉，甘冽。丁酉七月，  
龍關寺圯，孔太守重修。

長岡陡轉暗塵收，萬綠含風古木稠。爲愛烏啼頻酌茗，  
憶經龍鬪此爭湫。方山一種存觚意，球水三迴作篆流。  
馬足不隨歸意迫，穿雲撻翠也忘愁。

紫城夏月之涼非久客於外不知其異

輪扇雕冰徹玉堂低回何似此清涼一天明月雨初霽  
匝地清陰花列香蠹簡翻殘情共杳蚊雷寂處適俱忘  
奇諧却似龍褒句浩浩團團夏夜霜

遊洱水

帝青開餞藏鷺羽拂風輪雪鏡循湖遠瑤蒼識面眞雲  
嵐成聚落城市映波潏却望層冥裏還應大有人  
盈盈秋在水滉瀟轉鳴榔柳港重重翠蘋花細細香管  
絃迷曲渚士女蕩紅妝往事耽湖海難將釣射忘  
臨水亭高揭煙波面面佳跡空唐使館人愛舊詩脾樽

俎情懷別雲山今古偕閒閒鷗數點天地渺無涯  
危樓浩淼天幹嶺掣東旋青迤龍關樹秋消雞足煙  
閱人碑字沒卜稼島痕遷彷彿前遊日悄悄又五年

山店

山店過雨雲倒行炯炯缺月退雲生驚棲山鳥中夜鳴  
高林大竹喧溪聲薄衾展轉夢不成瓊樓美人隔玉京  
何由相憶此時情

順寧阿魯石至芒街渡

踏踏馬蹄缺悵悵疲僕遲山行日益高谷行日益卑連  
巖忽中斷橫江鬱怒馳緣壁下如綫出石愁傾欹竹筏

渡回沈毒霧壅迷離密樹厚積葉蒼蒼森路歧呼鳴辨  
鬼鳥爪踪雜虎羆野人如猿綠結厚山之眉日夕投古  
戍山茅薦飢炊夜氣溼鐙燄花散墮龍昨昔京洛道  
垂楊夾九逵紅樓豔歌舞舞羅金卮白馬何蕭蕭當  
風揚蓬蓬行人泥春景意氣生遊躡行路有苦樂苦樂  
無定期自非這行人世路焉得知

臘門行傲王建荆門行體

臘門溪頭溪水長臨崖大木椽作梁溪南三月行人絕  
南風如燄烘林樾四月巖家山上遷尋涼逐水深竹邊  
夷女浴歸雙足白野花亂插香雪偏燒山種稻不須水

陰陰溽暑滋杭紫暑氣蒸雲貼地鋪漫漫銀海天模糊  
一雨一晴瘴煙起日中五色紛縈紆防煙避雨不計程  
虎牙孤戍氣猙獰下有毒泉清見底飛鳥一飲中墮死  
遊魚撇撇不可釣蛙聲如犬衝人起連蝥怪木交陰深  
同根異實青森森象行草中不見脊火犀怒觸山石砉  
蠻兒耕田負努刀山僧咒虎巖村柵南中賈客操蠻聲  
不辭荷擔年年行職方以內險如此九猛之南可知矣  
山經異記闕紀多奇遊畢竟將何底青翎小鳥呼歸飛  
飛飛不竟不如歸

芭蕉果

緣雲山閣翠涵淹  
蕉果穠香得味慳  
半褪花房蓮片片  
密排蘭實玉纖纖  
露華披折金雙掌  
素質清虛雪一匳  
草木南方誰續狀  
天生與滌瘴鄉炎

蘭滄江歸自神洲渡濟

連峯直上隘層霄  
萬里波聲壓海潮  
源近黃河初泐處  
流專赤縣最南條  
盤渦當畫蛟螭窟  
裂石欹崖風雨搖  
百尺浪花飛渡險  
豁然瘴暑已煙消

炎天赤浪勢熒然  
五色眞隨四序遷  
石壁風號千樹偃  
鐵橋雲退一絲懸  
排山不假夸娥臂  
到海還踰夏后先  
悽惻蘭滄傳漢曲  
昇平今日際堯天



山頭極望遠茫茫天塹何勞限異方勝國蟲沙消澆  
百蠻犀翠入梯航風盤曲棧人煙出雲擁深篁鳥道荒  
棄險自全臣節死猛公祠宇最悲涼

黑水遐荒考辨難崑南崖上壯觀瀾九州到此遊方遍  
萬古如斯逝未闌夜靜潮聲翻海溢夢回落月下巖端  
舉頭矗矗天梯引若士汗漫道路寬

竹實

竹實如紅豆由來籩米殊南荒深巨蕩密葉隱聯珠採  
擷參蠻糗續紛落鳳味奇珍人不遠煙雨自涵濡

傘兒草

小草騰衝嶺靈奇不死能辭根蠻瘴遠滴水翠雲蒸細  
葉攢花樣孤莖韞石稜長生真大藥枯苑已明徵

松楸欖

蒼松老翠嵐異藥得幽探圓綴蒙蘿紫滋回諫果甘熱  
中冰飲滌苦口舌香含遮莫紅鹽子粗能解酒酣

魁莢

靈苗滴露生搖影翠輕盈羽葉排輪扇雲漿浴玉嬰乳  
酥融點化冰雪湛虛明藜糝兼諸芋多方骨董羹

榧松子

榧子如松子芳腴質兩融旅生凝練實乳綴儼梧桐百

果當筵紉三蟲避影空苞龍來落鳳爲念舊樓叢

冬蟲夏草

離離山上草趨趨雪中蟲玉踊翹根起青萌坼尾豐寒  
暄機出入變化腕初終烏足與螭蝶回環無此工

山行驟雨

黑雲出峽挾雨奔山旋石偃蒼林昏濛濛曲磴銀灑翻  
老竹倒卧遮行鞍人乏馬饑行路難年年龍醉知今日  
輸與酒客嘲臧孫

黔山雪後

黔山二千里積霧無春冬一夜滿積雪馬首森萬峯一

一插虛無朗如白芙蓉雖苦曉寒別放開塵胸危橋  
靜安帖老屋欹龍鍾斷冰咽澗泉隔葉鳴淙淙有時餘  
霏微灑落崖上松前路仰天際人馬杳憧憧如彼蟻緣  
壁了了見行踪繫馬酒家墟巡簷拂凍松勞生信可恤  
半途誰能備

晚行

山雲照行路不知寒夜深梨花千萬樹明月生空林村  
巷寂登足巖泉鳴凍岑客心悽絕處幽谷一聲禽

冰舵

水澤增堅江舟檣斂寂寥順時成利濟履險得逍遙直

據烏皮几平凌碧落霄依然刻木意遣省打冰條方軫  
車同較天衢斗挈杓踐波開蜃市卽地碾鮫緙搖曳鮪  
鱗引浮遊鴈鷺飄披煙移皎月舞雪擁驚潮山繞跣趺  
翠天橫漭蕩遙轉蓬源古制泛駕靜塵飈巧類張融宅  
權符大禹樾何須遇稟盪不辨廩君漂仙路遲琴鯉迷  
津得手撓晶宮難副意麻嫗慎相邀

結意

風馬雲車結意重玉山蘭野儘從容鴻鱗寂寂蒼苔掩  
樓榭沉沉細雨濃二月花攀歡氣息雙襟榴插豔他儂  
但教一覲終成感錦裝應知憶子丰

鷓鴣

鷓鴣聲驕蕙草柔詔華如水逝難留遠山春到思螺黛  
綠樹陰深響玉鈎婉轉簾櫳通燕語披離風雨爲花愁  
三清十洞殷勤遍鰈鰈鷓鴣願未休

張家灣解纜和戴崧雲同年韻

東便門東趁夕暉煙波最好拂塵衣鄉關遠近同爲客  
山水登臨也當歸堤柳雨深秋更綠野鷗風定暮遣飛  
扁舟更有陶焦侶恣意江湖未足非

泊頭鎮懷孫觀城

孤帆婉轉綠楊絲水驛亭臺浸碧漪爲念故人行絕塞

憶纔攜手宴南皮琵琶曲院翻新調  
菡萏秋風映客卮  
自笑石婆顛倒夢萍踪浪跡已多時

中秋月

今夜團團月清輝萬里同高堂  
憐客子皓首仰晴空  
秋漲無邊白華鏡  
蹙水紅同舟歡共飲未解慰飄蓬

十六夜月

帆行不覺晚林月已東生圓彩  
猶前夜他鄉又一程  
暗蟲喧露急孤鷺撇波明不盡  
良宵與嫦娥對盞傾

十七夜月

漫漫天接水夜夜月隨船  
暝色遲蟾影清輝減鏡邊  
晚

花分桂露紅粉惜瓜年竟夕憐相照娟娟到曉天

運河舟中

長帆信微風人閒語音寂少渡蘆蕪葉玲瓏時激激便  
岸菰蒲香支窗楊柳入鷓鴣下却回蜻蜒颺欲立芳洲  
渡迴緬斜流過徑直炊煙冒平楚微茫見城邑停雲如  
遠山際海照晴色曠茲千里自一暢客情鬱高咏滄浪  
歌此意從所適

濟寧太白樓

澄湖渺渺碧山浮倚檻雲嵐憶獻酬墮謫仙人間作客  
憑凌天地此登樓忘形海鳥鴛鴻聚快意丹砂駿馬遊



勝地芳名留一醉人間富貴等浮漚

朱超綠 同年招遊山塘夜飲

劔池雲氣窮 嶽岑皎月澄  
波浸碧 斟絃管 秋風移畫舫  
湖山燈火散 花林共憐子  
夜纏綿 曲一慰天涯 離合心  
明日孤帆回首處 吳江楓葉正蕭森

姑蘇臺

姑蘇臺上醉 金卮歌舞繁  
華未了時 願倒人間殘夢好  
紅心春草葬西施

李敬茲 同年招飲湖上送別高美東來玉湘往金

華和戴崧雲韻

蘇小峯簾駐壁車桂楫有情通宛轉雙峯弄影對軒渠  
分攜莫負梅花約雪夜山陰思有餘

賈亭

賈亭楊柳踈停舟解珮芳情箇怎酬紅葉一墀花影寂  
理絃聲在水西樓

倚徙餘醒曉意閒花枝倭墮綠雲鬟水晶簾下芙蓉鏡  
淡染南湖一曲山

七里瀨

三拜先生峭病呻支離疏兀不亡真虛名身後知何與

如此江山不負人

江瀨蕭蕭風雨音一編晞髮共悲吟巖陵風義人寔絕  
托得當年許劍心

上瀧般

長艫婢約蓮花躡翠袂飄指風滿江越女皎然天下白  
一齊揜袖出爭灘

蘭溪道中

泉響四山空石深秋氣聚密竹連溪崖積翠自成雨野  
渡杳無人人聲隔煙語

景寧山中見天臺高出天際沼行一日

越嶺重重堆 雲煙覓峯忽落雲 倒旋含光轆景青 聯翩  
千峯萬峯深 無邊矯如天門朝羣仙 圭葵挺直旒冠綰  
神女飄飄翹 煙鬟金支翠旗有無間 天風吹入骨珊珊  
有時桃實流芳鮮 此中一入迷往還 彼姝者子難爲緣  
嵐深翠鬱長千年

福寧道上寄翁凱恭戎府

東南天地盡 壞瀛大姥霍童心 遠傾客路驅人俄自笑  
連山到海岌難平 溪厓潮落林淒響 石磴雲過雨細生  
爲報故人相見駛 別來十載有長征

白鶴嶺望洋

萬島雲濤白島盡一蒼然飄飄洲國影  
羃羃沃焦煙河伯晚聞道大鵬飛動天  
竟難情措處操縵撫成連

水口暴風舟人呼下龍風雨霰也

驚濤蹙電輪絲樹偃雲津白雨飛龍  
風寒風縮蛋人歸程遲上水世味澁  
勞薪萬里孤舟客蕭然對臘晨

野梅

甌嶺無寒意梅花也自芳風吹一林  
雪春漲滿溪香小泊斜當影孤村亂  
拂牆故園三十樹憶我竹間牀

嶂山亭望匡廬

嵐翠濃如涇山亭殷瀑聲到來真面  
出似我點蒼橫高

挾江湖轉虛涵天地清東林期一宿倏忽冥雲生

古意

鏘鏘環珮七香輪桃李芬菲洛水春傾國佳人方絕世  
東鄰之子舊窺臣唾落石花留染袖紅飛青鳥爲脚巾  
汎餘清瑟分明訴好托行雲到玉津